

KUBIKWA KWA BANKWASHO

 Kabiji, akyo, kitanshi ke kubikwa kwa bankwasho mu kipwilo. Kabiji akino kipwilo kyetu kicheche kuno kiimena. Kechi kijipo nakiji kyonse kya budinominesheni nangwa kiji kyonse kyakutuma bankwasho bakyo ne, akyo kisajila akyokiine bankwasho bakyo. Kisala kafunga wakyo, kisala baketekelwa bakyo, kisala kiji kyonse akyo kikalapo ne kifumapo pa kipwilo. Kafwako muntu nangwa umo uji na ng'ambilo ya musango-yewa pa kintu kiji kyonse ne, ke kipwilo. Kabiji kipwilo keboba beya ne kutundaika kipwilo mukutanwapo kwabo, na byabujikumi byabo ne byamilambo, keboba kimye kyonse baji nalusa lwapewa lwakwamba-kiji kyonse mukubikwa kwa kyokyo.

² Kabiji Amiwa nakeba kusachila kije kyabankwasho bafumapo, kabiji Amiwa nekyambila kufuma kuno kubipwilo byonse. Inge bamo ba mubaabo batemwe baji muno, ao wajinga Mulongo Cox, Mulongo Fleeman, ne Mulongo Higginbotham ne Mulongo Deitzman, abo betupa mwingilo wawama bingi atweba, bapaine kwi Nkambo, mu ino tabbanako.

³ Kabiji bimye byavula, mwaila mizhilo yalengwa ya kipwilo, mwaka yense, mokyailatu bankwasho nangwa bakaketekelwa bafwainwa kufikizha kimye kyabo. Kabiji umvwe bakeba kubwelapo jikwabo, kijitu bulongo. Inge abo kechi babena kukeba kubwelapo jikwabo ne, nanchi abo bafwainwa kubikapo bakwabo pabifulo byabo, amba akye kiji kyaleka mingilo yakyo.

⁴ Kabiji bufuku bukwabo Amiwa naichile kije kya baketekelwa, akyo ke kije kipya kyabaketekelwa. Namwene Mulongo Luther McDowell kuno bufuku buno, twauvwa lusekelo atweba pakumumona aye kuno, ao wajinga kala mukije kyabaketekelwa. Naile kokwa uno mulungu nakukeba kuyuka ne kukupesapesa mukyokya kipikichala kyajinga kyafotositatiki kyalengelwe, akyo kikapewa ku kipwilo, ne akyo. Amba baketekelwa pano bamu kipwilo ke Mulongo William Morgan, Mulongo Mike Egan, kabiji ne Mulongo Banks Wood, ne Mulongo Roy Roberson. Kabiji bonse abo kebamuyenka uno muzhi, kufumyakotu Mulongo Roberson ao wikala pakachi kamizhi ibiji. Aye Nkambo wamumona wafikilamo awa muntu, kabiji baikala ke bantu bamushingi, kabiji pano abo batambula mwingilo nobe baketekelwa bakino kipwilo.

⁵ Kabiji nanchi aye mbungeno byoyatwajijiletu kulutwe, kabiji kyabujilwe kwi kafunga wakibiji kwi atweba amba, ke kusala kwa kije kipya kyabankwasho, amba abo baingila kala kimye kyabo kyapita kabiji—kabiji bakileka mingilo yabo,

nanchi ke kusala kwabakwabo bankwasho. Pano, kipwilo... Musango akye mwakwikyubila, ke, kije kyafwainwa kutongola bankwasho, muntu ao abo yebatangwanaji kabiji watanwa na mushingi ne muntu waoloka.

⁶ Awa ofweshi wa nkwaso ke ofweshi mukatampe bingi, kabiji ke mushingi wabaya bingi kwi Nkambo kwikala nkwaso mu kipwilo. Kabiji nanchi, mumpwijilo bufuku bukwabo, muntu umo wangichile kwi amiwa. Kabiji kimye kya kusambakana ne kafunga, pa kulondela... akye Kitanu kyapelako, akyo kyajinga kyaswang'ana na yiwe muntu amba abo wajinga wamushingi ne muntu waoloka.

⁷ Umo mwanamulume wa kyanyike ao yebataine, kechi wajinga bulongo wafikilamo ne (kechi mambo akuuba mba kechi wajinga yewa musango wa mwanamulume wawama ne), umo wajinga wafukulwa kutana muboba bantu bamushingi mukije kyabaketekelwa. Bino nobe kafunga ne Amiwa byo twaishile pamo, kabiji Naipwizhe myaka ya mwanamulume mwanyike, aye wajinga pa kwiya kwanji kutanshi yamatwenti. Wamushinki, waoloka, kabiji mwanamulume walumbuluka, bino kyakutana amba aye wajinga mwanamulume wabula kusongola. Aye Baibolo wakambizha amba nkwaso wafwainwa kwikala mwanamulume wasongola. Aye wafwainwa kwikala mulume wa mukazhi umo.

⁸ Kabiji nanchi muntu mukwabo wajinga muntu wamushingi bingi, wajinga wafikilamo muyoya kinto kabiji wakonsheshe kwikala muntu walukokelo, nobe mulongo byoamutongwele aye. Nanchi panyuma ya kupesapesa aa mambo, amba mulongo po aishiletu mu lulwe Lwitabilo, bakazhi banji kechi baketekela mu Kikye ne. Nanchi akyo kyokyamufumyapo awa muntu muyewa ofweshi. Mambo aye wafwainwa kwikala na kisemi kyanji kyonse mu kukokela, ne abo bafwainwa kwikala mu Lwitabilo, mambo kyafwainwa kwikala ke malwang'ano.

⁹ Kabiji atweba tubena kushimika pano, kabiji atweba tubena kukeba kwikajika kikye kipwilo. Kabiji nobe mukulumpe wa kipwilo, Nafwainwa kumona mba kibena kulamwa, mwaila Binembelo, bintu byonse bijitu bulongo pa Kyambo.

¹⁰ Kabiji nanchi onkao mambo, nanchi, kyatanwa mba kekintu kyatalwa bulonga ku kije kabiji ne kafunga, kabiji ne mukulumpe, kusala jije jibumba jabantu kuno bantu abo botwalanguluka amba bamushingi kabiji ne bantu baoloka. Atweba twakonshatu kwibaleta abo. Kabiji byobyokiji, nanchi, abo batongolwa kukipwilo, monka mwaila kuvota kwabo. Kabiji nanchi abo bantu bakonhsa kwingila, inge abo baumvwa amba bakonsho kuswa awe ofweshi. Nanchi abo bakeya mukakimye kacheche, mukumona kana inge bakonsha kumvwa kana kampe Lesa wibeta abo. Kabiji inge kulutwe, inge abo baumvwa amba kechi bafikilamo ne, nanchi, abo baji naluusa pamilungu icheche

yalondelapo bafwainwa kuleka mingilo yabo ya ofweshi, amba muntu mukwabo wafwainwa kutongolwa mukubikiwa mubifulo byabo.

¹¹ Nangwa byonkabyo, ku ntendekelo ya kusangululwa amba (inge Lesa waswa) Nakeba kwikala nakyo kuno muno mu tabbanako nobe katatakatu inge Amiwa nkokolekepo, nanchi Amiwa—nanchi Amiwa...atweba tusakupesha babo bankwasho kupichila mukwibantenteka maboko, bankwasho ne kalama wa mali wakino kipwilo. Bino pantashi abo bafwainwa kutongolwa kabiji—kabiji nekumona kana bakonsha kwikyuvwa byepi akyo kabiji ne kana jibumba jibatemwa abo nyi. Nanchi inge akya—nanchi inge akyo kijitu bulongo yonse mbaji ibiji, nanchi atweba tusakulenga abo bantu kwibapesha kwikala bankwasho, nobe byonka biji musango umotu usajilwamo Baketekelwa.

¹² Ke kokwa kwiimena kabiji ne muzhilo wa kipwilo, na Kyambo kyakwa Lesa. Onkao mambo, akyo, kechi bakonsha kwamba mba “Naketekela mba awe muntu wakonsha kwikala muntu walumbuluka ne,” abyoye kechi ibyo ne, “Mulongo Neville walanguluka mba awe muntu wakonsha kwikala muntu walumbuluka,” nangwa “kije kya baketekelwa balanguluka mba awe muntu yewafwainwa muntu walumbuluka.” Kyafwainwa kwikala kupichila mu kipwilo! Kafwako nangwa umo wakonsha kuba kyokyo kintu kimo mwi aye mwine ne. Ke kuvota kwa kipwilo. Ke kwiimenatu kwa kipwilo.

¹³ Aya mizhilo yakulondela yakala yaonawinwe mumuyulo wa mu 1937. Atweba twasombololatu kuyoya, kabiji yikakobekwa pakibumba papo katatakatu, mingilo yabo baketekelwa, bankwasho, bakalama, ne bakwabotu, kafunga, ne bakibiji, bakibiji ne bakwabotu.

¹⁴ Kupichila mu lusa lwa Lesa, kyaambiwa kwi amiwa, kabiji wanu handuledi paseti wafikilamo wakuvota ku kije kya kino kipwilo, kyo bataine mba Mulongo Hollin Hickerson kwikala muntu waoloka, muntu wamushingi, kabiji mwaila monka kikye kifulo kyakutambula mushingi mu—mu mukatampe kewakwikala nkwashe monka mokyaambiwa muno mu tabbanako.

¹⁵ Neapo, atweba twatana mba, ne kuvotelwatu monka mukije, amba Mulongo Collins ne aye watanwa amba uji na mushingi kabiji ke muntu walumbuluka. Kwikala wamwingilo, aye mwine, onkao mambo twafwainwa kumwimpuzha amba eye na kwikala ke—ke nkwashe wa kipwilo; kabiji kechitu bunkwashe ne, bino ne wakibiji kafunga ku Mulongo Neville, kabiji kampepo ku jibumba ja sukuulu wa Pamulungu, nangwa kusenda kifulo kya kwa Mulongo Neville, nangwa kiji kyonse akyo kyoaitwako aye kwikala wakibiji kafunga kwi Mulongo Neville. Ao ke Mulongo Collins.

¹⁶ Kabiji, ne akyo, kipwilo kyatana mba, muji jishuko, amba Mulongo Tony Zabel, ke wamushingi kabiji muntu walumbuluka, kabiji aye waitabilwa kala kumeso ya kije kyabaketekelwa ne bakafunga, ne kumwipuzha aye amba atambule ofweshi wabu nkwaso mu ino tabbanako byo kyaambilwe.

¹⁷ Kabiji neapo kyaipwizhiwe, kabiji ne kutana muntu wamushingi mukachi ketu... (Kechi... akye kechi kyajinga muntutu umo wamushingi ne, pano, bino wajinga walumbulukwa nekusalwa na kije.) Mulongo Taylor kufuma ku Henryville, nangwa Memphis, Naketekela byo kiji, Memphis, Indiana. Aye waikala ne atweba kimye kyabaya, kasa abena kwingila nobe asha kabiji bikwabotu byakonsha. Amba kipwilo nakyo kyatanamo jishuko mwi aye, nangwa kije ne bakafunga, amba aye wakonsha kuswa awa—awa ofweshi mukatampe kwikala nkwaso wa ino tabbanako ya ambiwa.

¹⁸ Kabiji neapo kyaipuzhiwe mba Mulongo Mike Egan mwaana-wakwa-mukowaji, Mulongo—Mulongo Bob Harned, wasalululwa na kije kabiji ne bakafunga, mukuswa kutambula ofweshi wabukalama bwa uno tabbanako waambiwa, ayo yaikala kinto yamushingi, kabiji ikebwa waoloka ne wamushingi.

¹⁹ Monka mukuba kikye, Nalanguluka mba, batemwe bami, amba kwimwita anweba kufuma kuno, ke kintu kyakonsha kwikala kya mushingi kwi anweba. Kabiji kechi kyonkakyotu ne, bino ke kintu kimo kya kuuba.

²⁰ Pa kino kimye Amiwa nsakwikala na Mulongo Neville, wakibiji wetu kafunga, mukutanga byatongolwa byafikilamo nkwaso. Mulongo Neville, inge wakonsha kutanga kufuma mu Kyambo kya Lesa. [Mulongo Neville watanga Timoti Mutanshi 3:8–13—Waku.]

[Pamo byonkabyo ne bankwasho bekale bashinga'ma, kechi banjimi ibiji ne, kechi batoma waini ne, nagwa balwiso lwa mali ne;]

[Kasa bakwachijila nakulama kyafyamika kya lwitabilo mu milanguluko yatoka.]

[Kabiji patanshi abo bebeseke kushinikisha na kyambo; nanchi bino bengile mu ofweshi wa bunkwasho, batanwa kwakubula kaneneno.]

[Kabiji neapo banabakazhi babo pamotu bekale bashing'ama, kechi bababang'ana ne, belama bulongo, bakishinka mu bintu byonse.]

[Lekai bankwasho bekale balume bamukazhi umo, kasa alama baana banji ne bamunzubo yanji bulongo.]

[Mambo abo bengila bulongo awa ofweshi wabunkwasho mwaitabilwa bepotela abo bene abwa]

*buneme bwawama, kabiji ne kuchichika kukatampe mu
luitabilo luji mwi Kilishitu Yesu.]*

²¹ Amena. Amiwa nakonsha pakino kimye kwipuzha babo batemwe baitwa, inge bakonsha kwenda kuya kulutwe ku pulatifomu pa ka kimye kachechetu. Kabiji byo tubena kukunyika mitwe yetu pa kakimye kacheche mu milombelo, Nebakeba. . . Kabiji ne kipwilo kyayuka byokiji akye, amba akye kekusala kwa kije kyabankwasho babo ne kalama.

²² Nkambo Yesu, ke kyamumilanguluko yalumbuluka, mumilanguluko yabulesa amba atweba twaiya kwi Anweba pano. Twaiya na mushingi wa Kyambo Kyenu Kyabaya Kyazhila, twaiya kasa twaketekela mba “Lekai kyambo kyonse kya muntu kikale kyabubela, bino kya Lesa kikale kyakine.” Kabiji atweba twasata kwi Anweba pa kino Kipwilo akyo Yesu kyo apotele na Mashi Anji Mwine awama, kabiji aye witupa kino kishimikwa na kupopwelamo.

²³ Kabiji nobe bakulumpe ba jije jitanga jikatampe, ajo Mupashi Wazhila jo etutongwejile kwikala najo atweba, atweba pano ketweseke kwijileta aje jibumba jamubumfumu, jibumba jabantu abo botwayuka amba babololoke kabiji atweba twaketekela mba Bayuzhiwa-namupashi kabiji benengezha mu yiwe ofweshi. Noba byonka byokya kwaambiwa namambo a kije kya bankwasho, “Yainga nakutala anweba bene mukachi kenu, bantu baji nasawakya wawama kabiji ne na Mupashi Wazhila, amba bakonsha kwingila muyewa musango, mukulamawizha bulongo bamukamfwilwa ne banabashiwa, mukwibapa mali, kabiji ne kulama bunoshi bwa kipwilo.” Myaka yakulutwe, atweba twatangatu akwa kunembwa kwa bakantampe, batundaikwa, wazhila Paulo, ao wajinga waambile mukwikajika kwa Binembelo mwaila byatongolwa byabibye bifulo.

²⁴ Lesa, nemekai yiwe muntu. Kabiji pano ke kusalulula, Nkambo, nobe kipwilo kiimenatu, byonka biji mubiji wa Nkambo Yesu, amba bobbe byakusala. Kabiji. . . [Kafwapo biji pa tepu ne—Waku]. . . kabiji tusa kukabika kiky kibese kya mpwijilo mu musango ungi, mu joja jaoloka ne Jizhina ja Yesu jazhila.

²⁵ Pano na mitwe yetu yakunama, kechi mitwe yetu yonka ne kana michima yetu, kabiji nobe yense membela wakino kipwilo, awa wiya kuno kimye kyonse kabiji ne kutundaika nabyanji byabujikumi ne milambo, ao watongolwa kwikala membala wa kino kipwilo, kimye kafunga ne Amiwa, bunke bwami, nakumona, wakibiji kafunga ye twingila nanji, Mulongo Neville, kabiji Amiwa nakumona, Amiwa nakonsha kwipuzha inge akino kipwilo kyakonsha kutana Mulongo Taylor kwikala muntu waoloka kabiji ne wafikilamo, monka mwaila buyuke bwamilanguluko yenu, kwikala nkwashe pa jije jibumba ja

bantu nyi? Anweba musa kwikiswisha mu musangotu umo pa kusutula kuboko kwenu. [Mulongo Branham waleka—Waku.] Kijitu bulongo. Pano inge pajipo kyapusanako, mwakonsha kusutulako kuboko kobe. [Mulongo Branham waleka kwamba.] Nakusanchila.

²⁶ Bushe kana bonse bamembala bamukino kipwilo batanwa kuno... kabiji bonse, mwataana kuuba mba Mulongo Hollin Hickerson kwikala muntu waoloka kabiji muntu wamushingi, kabiji ke muntu watanwa kumeso enu wafikilwamo kwikala nkwashe wakino kipwilo kyaambiwa nyi? Mwakonsha kwikiswisha mokusutulako kuboko kwenu kwa kilujo. [Mulongo Branham waleka—Waku.] Inge kyapusanako, nanchi suntulai kuboko kwenu. [Mulongo Branham waleka kwamba.]

²⁷ Bushe akye kipwilo kyatana Mulongo Collins kwikala musango umo, muntu waoloka kabiji muntu wamushingi, kabiji wafikilamo kwikala pa mwingilo wabunkwashe bwamukino kipwilo nyi? Mwakonsha kusutulako kuboko kobe. [Mulongo Branham waleka—Waku.] Kijitu bulongo. Kyapusanako, mwakonsha kusutulako kuboko kobe. [Mulongo Branham waleka kwamba.]

²⁸ Bushe akino kipwilo kyatana Mulongo Tony Zabel kwikala muntu wamushingi kabiji wafikilamo mu uno ofweshi, wakwikala nkwashe wajino jitanga jakino kipwilo kyaambiwa nyi? Mwakonsha kusutulako kuboko kobe kwa kilujo. [Mulongo Branham waleka—Waku.] Kyapusanako, mwakonsha kusutulako kuboko kobe. [Mulongo Branham waleka kwamba.]

²⁹ Bushe ajino jibumba jaswa amba Mulongo Harned ke muntu waoloka kabiji ne muntu wabololoke, ao waikala ne atweba pa kimye kyabaya, kwikala ke kalama, munembeshi-kalama wakino kipwilo, mukutangijila kutala kwapa mali ne kupana kwabyamalipilo nyi? Inge byobyo kiji, suntulai kuboko kwenu kwa kilujo. [Mulongo Branham waimanako—Waku.] Bushe pajipo lupusano luji lonse, suntulai kuboko kwenu kwa kilujo. [Mulongo Branham waleka.]

³⁰ Nasaka kwamba ku—ku batemwe baimana pa kino kimye kya pelako, munshi wa yiwe musalabo kuno, amba akino kipwilo, na kuswisha konse kwapwijijika (kwakubula kyapusanako kiji kyonse), mwatanwa anweba bonse bafikilamo kumeso akwa Lesa kwikala muiwe ofweshi wakwa Lesa wimwita anweba.

³¹ Pano, anweba, yenu mwaamba, “Lekai abe patanshi besekewe, kabiji tumone kana inge abo baji nakukabila kwa uno ofweshi.” Mu milungu icheche, Lesa inge waswa, Amiwa nakabwela na kubika maboko pa jije jibumba ja bantu, mukwibalenga pano abo kwikajikwa ke bakete... nangwa bankwashe bakino kipwilo, kabiji ne kalama.

Twayai tukunyike mitwe yetu pa kakimye kacheche:

³² Nkambo, tuji bingi na lusekelo bufuku buno pakumona mba kuji muntu ubena kwikala panopantanda wakonsha kwenda wa bulesa kumeso a ntanda; waikala wabulesa bwakuba mba tabbanako, nabyamizhilo byakosa byakulondela nobe ao byoaji, kyakonsha kuvota bantu faivi pa kino kifulo nobe bantangi babo, kwakubula voti nangwa imo yapusanako ne. Atweba twasangalala namambo aabo, atweba twaumvwa bulongo amba Anweba mwajinga ne atweba byotwajikufukulanga kuba kikyeye, akye kije kabiji ne bakafunga.

³³ Lesa, peshai babo bantu. Kabiji lekai abo bengile muiwe ofweshi na muchima wabo yense, kasa bayuka mba mwibapotele abo namutengo mukatampe wa Mwiulu. Juba jimo kimye ma Buuku a Mwiulu po akashikiwa, lekai awa Buuku wabintu byamwiulu kabiji ne bintu bikatampe bya Mubuuku wa Mwiulu bishinkuke, lekai mazhina abo mukupwijijika konse ekale kwi Lesa kabiji ne Mupulushi kabiji ne nzhitu yonse ya Mwiulu, mukwikala musango umo mu Bufumu Bwanji. Bapeshai, Nkambo, kabiji lekai bengile yiwe ofweshi bulongo. Mu Jizhina ja Yesu twi musanchila Anweba pa babo. Amena.

³⁴ Nasaka kwimwimuna mumaboko enu, Mulongo Harned, ne Mulongo Zabel, ne Mulongo Collins, Mulongo Hickerson, ne Mulongo Taylor. Njibingi na lusekelo pa kuyuka mba tuji na lumvwang'ano lwa bupopweshi mu kino kimye na bantu bamushingi. Lesa emupeshe pano. Kabiji atweba tukemumona bulongo konkakwa, nobe katatakatu Amiwa kokoloke, mukubwela jibiji, kabiji ne kumona kana anweba mwatemwa ofweshi wenu. Kijitu bulongo, konkakwa kuvota kwabo, Naketekela kyajinga kyaitabilwa kypawijijika, kechi pajipo kypapusanako nangwa pacheche ne.

³⁵ Oo, anweba kechi mwasekela mba mwakwatakana na bantu leelo bakonsha kwikala ku meso akwa Lesa, bulesa, kabiji ne kwikala kuino ntanda ijipo muyewa musango nyi? Ke kintu kyawama bingi.

³⁶ Kabiji Amiwa njibingi na lusekelo pa kuyuka bufuku buno amba Njina jishuko ja—ja kwikala na babo bantu kabiji ne kino kipwilo kyaikala balunda nami. Amiwa njibingi na lusekelo mambo Lesa wandeka amiwa mwine na Kipwilo Kyanji kuzhokoloka ntanda yonse. Oo, basulwa kabiji bakaanwa ne kwamba pa kikyeye, kabiji nobe byonka byo Najikwamba lukeelo luno mu mbila yami, kampe mu mateshi, nobe musango ntanda byo ibatala pe abo, “jibumba ja kisangajimbwe,” bino Lesa utala pe abo nobe baana Banji. Amiwa njibingi nalusekelo pakyokyo. Abo kechi bankosha kwimubula anweba mamailoshi anga alepa pa ng'ondo. Abo kechi bakonsha kwimubuula tanchikilo yonse ya bya mwiulu kabiji ne byo bingila ne. Bino kuji kintu kimo kyo

bayuka, abo bayuka mba kimye kyo basemekelwe jibiji. Amiwa njibingi na lusekelo pe abo.

³⁷ Kabiji nobe kishimpi kicheche kyo Nafunjile, kabiji Amiwa nsakukonsha kwikileta bufuku buno na baana bami babakazhi babacheche namusango wakwileta pakwiya kunzubo ne atweba, pakwikileta kintutulu kwi atweba, amba anweba mwakonsha kukwatankanya kilumbululo kiine. Lukeelo lumu, pa kwimana kufuma pa mwanya... Amiwa njina bansongwakazhi babiji babacheche. Umo wamwiabo ke Rebekah, kabiji umo wamwiabo ke Sarah, kabiji ke bansongwakazhi babacheche ba bataata.

³⁸ Kabiji Amiwa njina nsongwalume mucheche, Joseph. Nafuminenga ku Chattanooga, kufuma ku mbung'eno bufuku bumo, mu kimye kyo Najinga kokwa mu kipekenyi kyapelako. Kabiji Najinga mu—mu motoka, kasa mbena kuya na mwanami wakala, Billy. Mukazhaji ne Meda bajinga mu motoka, ne bansongwakazhi. Kabiji nobe atweba byotwajinga konkakwa, kafwako nangwa muntu umo waambile byavula pakubujilwa kwa muzhi ne. Kabiji Amiwa najinga nakuchibaula pacheche pa bantu abwa bufuku mumusango mobaubijilenga. Kabiji kafwako nangwa umo waambilepo kintu kiji kyonse ne. Kabiji Joseph wamucheche waishile na kukwata pa kipuzhi, aye waambile mba, “Taata, kine wasapwila bufuku buno!”

³⁹ Kabiji ne lukeelo luno, nobe Amiwa byonaikelenga kokwa ku Mukwakwa wa Eiti ne Teni, na... nangwa Penn ne Teni, nangwa byonkabyo, kafwako nangwa umo waambile kintu kimo ne, mukazhi ne bansongwakazhi babiji. Kabiji Joseph mucheche wakwachile kipuzhi kyami jibiji, aye waambile mba, “Taata, kuuba mba, Amiwa kine nakusapwila lukeelo luno,” aye byo aambile.

Naambile mba, “Kyawama, Njina umo fani, awa ke mwaana wami.”

⁴⁰ Kabiji kukwamba kwetu kucheche. Umo awa lukeelo, twaikele monka mukibamba, mucheche Becky ubena kwiya kokwa ne, kwaamba mba, wazandwile kuulu kwanji ne kubika mukoko wanji kuzhokoloka pe ami, kabiji aye ke batata bacheche bansongwakazhi. Kabiji aye wakumbachilemo ami. Kabiji Sarah mucheche watolokejile pamwanya ne aye mucheche pajama kabiji wakonsha, kwiya nakunyema jikwabo. Aye ke yewa mucheche wameso-achiluluka umo.

⁴¹ Mucheche Becky wakonsha kwaamba mba, “Oo, Sarah, kechi kikebewa obewa kwiya ne, mambo Amiwa njina bonse Bataata. Bataata bami bonse!” Kabiji mucheche Sarah, aye mivumbo yanji icheche yaile panshi, meso anji acheche achiluluka avwetelwe. Amiwa naumvwine nobe *bibye* kabiji nakatazhiwe na jinungo jikwabo, kabiji aye waishile ne kuzhokolosha byobya.

⁴² Becky wajinga na kulu kwalepa bingi, nanchi kwakonsheshe kufika panshi. Mucheche Sarah wajinga ubena kukalaba, nanchi Amiwa nabikile maboko ami kuzhokoloka Sarah. Sarah mucheche watajile pe Becky ne kwamba mba, “Becky, obewa wakonsha kwikala na Bataata bonse, bino Bataata baji ne amiwa bonse!”

⁴³ Kabiji Nalanguluka mba abyo byobyo kiji pano. Atweba kechi twakonsha kuyuka byonse bya masukuulu a mamboawama kabiji ne byonse byambo bikatampe bya Ngiliki, aje jibumba ja bantu kechi bakonsha kuyuka ne. Bino kuji kintu kimo kyakine, Naketekela mba Yesu uji ne *atweba* bonse. Amena.

Kijitu bulongo, Mulongo Neville. 

58-0720^E Kubikwa Kwa Bankwasho
Branham Tabernacle
Jeffersonville, Indiana U.S.A.

KAONDE

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaana, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org